

Program Kembara Hati Siswa Perdana SeMAMPAN pikat penduduk Kampung Nyentil

Oleh: MOHD NORFARHAN MOHD MUSTAFA



Pengalaman menaiki bot dari jeti Kuala Medang, Kuala Lipis dengan perjalanan mengambil masa selama dua jam untuk sampai ke Kampung Nyentil sudah pasti agak mendebarkan bagi sesetengah pelajar universiti, namun ianya amat bermakna bagi 35 pelajar Universiti Malaysia Pahang (UMP) termasuk lima pelajar antarabangsa, masing-masing dua dari negara Pakistan dan Bangladesh serta seorang dari negara Indonesia.

Perjalanan melalui kawasan jeram dan melawan arus Sungai Relau yang deras, pastinya menguji keberanian peserta bagi menjayakan misi Program Kembara Hati Siswa Perdana (keHATI) yang berlangsung di sebuah perkampungan yang agak terpencil dan tidak pernah menerima kunjungan luar, iaitu Kampung Nyentil Pos Lanai yang terletak di Kuala Lipis di negeri Pahang Darul Makmur.

Program bersepadu yang julung kali diadakan ini turut

disertai oleh Yang Berhormat Dato' Wan Rosdi Wan Ismail, Pengerusi Jawatankuasa Pembangunan Luar Bandar dan Hal Ehwal Orang Asli Pahang yang juga merupakan penaung jawatankuasa pelaksana bagi program ini serta beberapa agensi luar.

Program lima hari ini bermula dengan acara penyerahan pelajar sebagai anak angkat dengan memberi peluang pelajar untuk tinggal bersama keluarga angkat yang terdiri di kalangan keluarga masyarakat Orang Asli sepanjang program berlangsung.

Para peserta juga dapat beramah-mesra dan mengenali lebih dekat dengan keluarga angkat masing-masing. Semua informasi melalui perbualan dan pengalaman menjalani kehidupan sebagai masyarakat orang asli direkodkan para peserta untuk dijadikan sebagai catatan perjalanan dan rujukan selepas tamat program nanti.

Aktiviti diteruskan dengan

menjalankan program pendidikan berbentuk ceramah motivasi dan aktiviti Latihan Dalam Kumpulan (LDK) kepada anak-anak orang asli. Peserta berpeluang menilai tahap pemikiran kanak-kanak masyarakat asli di sini.

Pada sebelah petang, penduduk kampung berpeluang mengikuti acara senamrobik dan sukaneka seperti boling kelapa, belon air, menyumpit belon dan sebagainya yang dapat mengeratkan hubungan peserta dengan masyarakat Orang Asli.

Pihak Jabatan Kebajikan Masyarakat (KEMAS) turut serta menyediakan aktiviti bersama kanak-kanak dan memberi tunjuk ajar teknik mengurut tangan dengan betul serta bersolek di kalangan kaum wanita di sini.

Manakala, pihak Lembaga Penduduk dan Pembangunan Keluarga Negara (LPPKN) membantu dalam memberi khidmat nasihat kesihatan dan menjalankan pemeriksaan darah kepada penduduk kampung.

Tidak ketinggalan, aktiviti *jungle trekking* dengan mengharungi denai-deni hutan dan mendaki bukit sepanjang laluan memberikan pengalaman kepada setiap peserta mempelajari dan menyelami cara hidup orang asli seperti mencari sumber makanan dengan menangkap ikan menggunakan bubu, menyumpit, membuat perangkap, mengambil rebung, mengenali makanan hutan, melawat kawasan padi huma, proses menumbuk padi, mencari siput sedut dan mengenal pasti laluan hutan.

Menariknya, program kali ini memberi peluang kepada masyarakat di sini menonton filem sejarah bertajuk *Hati Malaya*. Filem ini mengisahkan perjuangan oleh pejuang-pejuang terdahulu menuntut kemerdekaan ke atas Tanah Melayu menarik minat penduduk untuk menonton.

Karnival Kampung Nyentil pada hari keempat program

